

OPINION

Skirbi pa Jenny Cratz

Despues di tanto aña

Trafico a tranca. Hendenan curioso tabata trata di mira kico tabata socede. Mientras mundo tabata sigui su curso di tur dia, un grupo di hende a reuni rond di e estatua di Boy Ecury pa recorda cu 45 aña pasa el a muri. Causa di su morto no tabata un enfermedad, un atake, un accidente. Causa di su morto tabata algo, cu awe despues di 45 aña, ainda ta mata asina tanto inocente y asina tanto hende, cu ta kere cu ta mihor muri ariba pia, cu biba na rudia. Boy Ecury a muri pa un ideal y e palabranan cu a worde expresa pa Nidia Ecury na tal ocasion, por ta bien dirigi na cualquier Pueblo di cualquier pais awe.

Tabata un anochi, mas di diez aña pasa, cu mi cu Nidia a yega di papia di Boy Ecury. Pa mi, Segundo Guera Mundial tabata un experiencia cu mundo a conoce y mester tuma como ehemplo di con un mente venenoso por a tranca concenshi di henter un pais y converti nan den asesino. Pa Nidia, Segundo Guera Mundial tabata mucho mas. E tabata tur loke Nidia a trata di contene den un discurso pronuncia antayera y cu realmente mester worde imprimi cu letter grandi pa nunca nos lubida.

Ora Nidia a papia di Boy, el a papia cu cada ciudadano di Aruba y di mundo y a recorda nos cu den nos curpa tin un concenshi! Manera Nidia a sa di bise tan asertadamente: "Boy, hende mescos cu cualquier di nos, ora a yega ora di escoge entre traicion o lealtad, entre biba o muri, a escoge pa loke ta bon y husto, segun su concenshi a dicte." E frasenan aki ta marca e cruzada importante, cu tanto biaha nos ta topa cune den bida. Un frase pronuncia na momento cu aki na Aruba tambe tin hende ta sclama pa Justicia; pa e Justicia cu hende mester haci cu hende. E Justicia cu ta haci cu nos mester puntra nos mes si nos kier cana ariba e caminda facil di tene tur hende como amigo y asina traiciona nos mes y na final nos mundo, o cu nos ta para firme y bringa pa loke nos ta kere aden.

22 aña di edad Boy Ecury tabata tin ora el a escoge pa loke ta bon y husto. Tin hende cu lo bisa cu e tabata loco. Cu e por a sconde y scapa su bida. Hende, cu no conoce palabranan manera principio, lealtad, firmeza y character, no por comprende cu den bida tin algo mas grandi cu solamente existencia. Boy no a sconde. Boy a defende loke el a kere aden y a paga pe cu su morto, cu tabata cruel, pero na mes momento mucho mas satisfactorio cu e morto cu ta spera esun cu ta biba 100 aña, pero pa a biba asina largo constantemente mester a mata su concenshi.

Awe despues di tanto aña, nos ta sigui recorda Boy Ecury. Su number a worde graba den historia. Number di un homber cu a escoge pa berdad, pa justicia, pa su concenshi. E circumstancianan den cual e mester a escoge kico pa haci tabata mucho mas dificil cu e circumstancianan den cual awe nos mester dicide kico nos lo haci. Pero nos dilanti tin hombernan manera Boy Ecury, cu ta puntra nos: "Kico bo ta escoge: cobardia o hombreza; justicia o injusticia; maldad o bondad?"

Awe, despues di tanto aña, nos a mira con tirania di Hitler a fracasa danki na esnan cu a entrega nan bida pa libertad, cu ayera y awe ta significa justicia, dignidad di hende, fin di opresion.

Boy Ecury a muri pa loke el a kere aden. Awe no tin guera. Pero su mensahe ta sigui acompaña tur esnan, cu ta nenga di dera cabez den santo; cu ta nenga di papia loke no ta berdad pa solamente complace; cu ta kere den firmeza, den character, den justicia y enbez di sigui coriente ta sigui boz di nan concenshi.

Pasobra awe, mescos cu Boy Ecury ayera, nos ta para na un cruzada. Concenshi ta papia cu nos. Boy Ecury a sigui su concenshi: el a bira un victima di Hitler, pero na mes momento el a bira otro palanca, na cual nos tur por tene ora e man di hiero di dictadura kier cera nos boca!